

爾時世尊告最勝曰菩薩所遊心無所著講
論諸法無所罣礙達知人根是夢幻法皆了
一切衆生之心善惡之念因緣報應來者逝
去若淨不淨苦樂好醜順逆縛解定亂窠窟
悉能知之先以曉了虛而不實復以宿命神
通之道如應說法令知空寂神足無滯靡所
不覩是謂菩薩觀達本無或現佛身而取滅
度現以方便不永滅度盡知衆生本末清淨
或現分離散落異處因爲說法知爲惡露臭
處不淨計常之人令除愛著復歎盡漏至泥
洹門設漏不盡亦不受證復爲衆生讚歎無
漏一切萌兆致無盡慧行大慈哀御禪三昧
遊止三四至四空定逮空無相不願之法修
三十七道品之德善權方便靡不開化觀彼
衆生在至八難除去塵勞永使無垢復以無
礙賢聖之道入於生死使至泥洹亦以權慧
大智之法兼化緣覺聲聞之乘隨從勸進令
至道場若在憤亂煩惱之中教人行寂不與

衆想若有衆生計諸所著有數無數現無所
有亦使諸人逮無所著雖處境界周旋往來
不與想著無所罣礙常與衆生說微妙法有
漏無漏有爲無爲善法惡法悉了知之亦無
罣礙復以無礙無漏慧本曉了衆生心行法
本隨彼形像安處無爲隨習俗教令解明法
心意識想不使起滅權慧通化常得自在是
謂最勝菩薩行觀解了身本內外無主念常
修行懷來無厭自獲永安復使衆生蒙其福
祐行大慈悲不懷怯弱然後乃致解身無主
及內外法亦復如是視其衆生如己骨肉有
所求索先彼後己大哀堅強所濟不虛皆使
得立奇特之德心識寂靜亦不動轉觀察身
本無可貪著復爲衆生而說不淨是身如城
終無盈虛身如溝澗時時流溢身如熾火吞
薪無厭亦如江湖投海無滿如是最勝菩薩
教誨分別思惟知之不淨亦使前人興不淨
想深入辯才亦無滯礙逮得摠持無所遺忘

能六

二

所教之言不失次第常得審諦正受三昧恒入寂然諸度無極降伏魔怨去邪亂想如是最勝菩薩觀身達知內外無有處所亦如幻化影響焰光入真諦法分別法界速離貪塵勤修正覺空無相願知一切法生亦無生無生亦無生雖處於生而無有二隨其所生開導度之執志勇猛不捨道意坐樹王下而自誓願吾今自盟若我不成等正覺者終不起于座也持心平等不捨佛道常與三界亦無所著自觀內法觀他人物亦復如是念求審諦清淨之慧了知常想悉無常想復次最勝菩薩自念如吾今日受有漏形何

由而獲斯由永劫積德不倦合集智業乃至此耳不念緣覺聲聞之道若有人來而趣向之心不恐懼亦不狐疑行於布施去衆亂想內自思惟使我成等正覺時相好嚴身作黃金色復訓衆生使立禁戒不墮惡趣順忍不起根門不亂勤加精進捨自大心三昧正受

心不流馳修成大智遠離欲塵以權訓誨達無邊際聖智之業未曾漏失所住牢固如佛之住分別辯才隨順應義遊心摠持不捨道教充滿衆生一切所願進御退轉使不墮落所陳言教與禁相應既自無隙不說彼短行菩薩道常省已過寧喪命根不毀彼此若有

能六

三

衆生自來歸命不以爲歡設不來者亦不憂感聞善不喜聞惡不怒將順一切令至道場終成佛道不違禁戒先救彼危不自求安施以七寶惠而不悔入深法要神通無礙復以神力觀衆生根深淺高下分別聖慧而爲敷演行無所著亦無窮盡雖在緣起心不染著一切諸漏不以爲證觀察法性而無吾我正法寂寞清淨無著三世興衰法無所住不見過去永以滅盡不察當來有對無對不念現在而常存者如是最勝菩薩遍觀億劫形兆法無所起法無所滅身行清淨而不爲惡口言清淨念常至誠意在清白不犯十惡是謂

菩薩應度無極便為諸佛而見授決慧根巍
 巍功德熾盛居十住位定不退轉奉遵於法
 亦不差違情性和順所行具足逮佛十力志
 若金剛了於法本有起有滅曉一切人心病
 輕重衆生若干性行不同所受果報能悉分
 明云何菩薩而受果報手執慧明除其大冥
 思惟果證最勝當知持強記劔刈去疑聚有
 所興造皆是果證因其果證修行廣施持戒
 完具如吉祥瓶心行忍辱如頻頭大士精進
 超殊猶善顏王禪定入微空慧菩薩是也慧
 心果證不可移轉菩薩慧施平等無二不見
 吾我有若干想於諸人物亦復平等人物以
 等得諸法等了法平等正覺亦等戒忍精進
 一心智慧悉解平等而無若干了一切生亦
 無所生生亦不生不生亦不生解生無生乃
 應法性是謂最勝菩薩達觀實窮一切真正
 大法不與塵勞而與共俱捨一切生不見所
 生既自布施不見所施或有菩薩以施求道

又以想著欲得滅度斯由雜毒還在生死計
 吾往古無數劫時曾於此界作轉輪王飛行
 皇帝隨意所念自然在前無敢違者子孫相
 繼經六十九中劫其間行施戒忍精進一心
 智慧與七寶塔高至梵天彌滿世界時世有
 佛号名勇進翼從羅漢九十億百千那術菩
 薩大士不可稱計吾自躬身四事供養衣被
 飲食牀褥卧具病瘦醫藥國財妻子象馬七
 珍奴僕走使下及民吏盡持供養彼佛世尊
 時我所施有染著心由是墜落處在生死唐
 勞其功不獲其報欲計彼時所興功德如毫
 釐許今存在者未之見也如是最勝菩薩惠
 施施亦有施施亦無施亦不見施亦不見非
 施施亦非施非施亦非施於施等者得諸法
 等解施無施乃應自然戒忍精進一心智慧
 亦復如是了智空寂亦不有智於智無智乃
 應智慧
 復次最勝菩薩復當思惟法寶云何法寶所

謂四意止四意斷四神足五根五力七覺意
八直行神通三昧諸度無極一一分別而無
吾我獨除闇冥使知大明建立慧智開化衆
生棄諸重擔心無猶豫修奉禁戒身意寂然
復當思惟建立慧珍亦不生心而有所倚意
離三世亦無內外不倚陰蓋四大諸入取證

滅度不見滅度七覺意華以爲華髮賢聖八
品以爲果報莊嚴道場以爲室宅導進衆生
引至無爲淡泊寂然無老病死亦無憂喜衆
苦之惱獨步三界而無所畏觀諸人物悉皆
清淨我人清淨人物亦淨了達清淨而無所
有菩薩從初發意以來當念清淨起微妙意

能六

五

於其中間終不復生姪怒癡意亦不施心當
燒衆生亦復不興二乘之心在於大衆方爲
上首雖處豪貴亦不貢高護於衆生不捨衆
生本無之心各各無實心無有心亦無結網
是爲菩薩金剛之意而不可沮長養善法使
不漏失思惟深妙弘誓曠大不可思議察一

切性不見所起亦復不見有成就者觀世幻
事皆不真實以清淨觀斯是顛倒不隨諸法
應與不應復不捨之有雜索者不見現在有
所積聚不見去來出有所由去亦無端來亦
無緒分別現在皆無處所尋究正法而不可
得菩薩建意要在顛倒不成之想是菩薩要

六十二邪是菩薩要身想戒見是菩薩要沉
吟猶豫是菩薩要質求天福是菩薩要或入
泥犁不計有苦是菩薩要或復變身入餓鬼
中及畜生道是菩薩要菩薩雖處五無間中
於中拔濟苦痛衆生安處無爲長存永樂亦
無起滅亂想之患思惟法界亦不可得所以
者何人由法生法由人興自起自滅亦無死
本人不離性性不離人人物自然不見蹤跡
吾我壽命亦復如是吾我自然諸法自然法
以自然道亦自然解知如是空達觀者便得
自然積聚之道所謂自然積聚道者妙觀無
二亦不見二菩薩復有速疾三昧入此三昧

者彈指之頃遊於十方恒沙諸佛國土禮事
 供養諸佛世尊還在故處人無覺者尋於座
 上即如其像三昧正受到于東方億百那術
 江河沙等諸佛刹土禮事供養諸佛世尊問
 訊聽受微妙之法忽然西過復至無量江河
 沙佛國禮事供養諸佛世尊已尋復南至無

量國土即還北方無量國土四維上下亦復
 如是於大眾中一坐一起無覺知者如是最
 勝菩薩入此正受定意彈指之頃遊于十方
 無量刹土忽然還至在于本位時坐衆生無
 覺知者如吾今日於大眾中敷說法義有二
 億菩薩不起于座各各遊至十方刹土今各

能六

六

還來在于斯座聽法衆生無能覺者皆由菩
 薩行純淑故

是時最勝前白佛言斯正士等所入三昧為
 号何等令諸菩薩周遊往返速疾乃爾是時
 世尊告最勝曰且捨菩薩所入三昧復有三
 昧名無礙通是諸佛世尊常所遊居如來入

此三昧已出入息頃遊於億百千姓江河沙
 等諸佛刹土亦使十方諸佛世尊來內此界
 不燒衆生有覺知者或持十方一切海水移
 在虛空如懸明珠無不見者不使水性有驚
 恐者斯名無礙通慧三昧

時二億中上首大士有一菩薩名曰海藏在
 于座上便自思惟如來必欲使我現於三昧
 神力即從座起往詣高座衆會之前稽首禮
 佛并諸上尊則住佛前叉手白言佛道深遠
 不可喻及無上正真之道實為難逮如今我
 觀一切菩薩及四部衆諸尊神天并來會者
 見此菩薩於大眾中而師子吼又且衆人飢
 虛於法來甚久矣今時難遇欲有所問若見
 聽者乃敢發言

佛告海藏隨汝疑網而問如來悉當為汝分
 別說之使諸菩薩及一切會令得悅豫當以
 智劍之大火燒汝愚癡之叢林是時海藏菩
 薩復白佛言唯然世尊向在座上心獨思惟

能六

七

而自念言斯諸二億正士積善甚久功德具足降調心意志存道法累諸善本獲此正受從無數劫承事諸佛禮事供養神通菩薩而此正士爲衆生故象馬七珍而已惠施皆使衆生類得成佛道或以退轉不堅固者行此定意正受三昧復有菩薩以塵勞故深入生死欲使衆生永無苦痛或有菩薩入慈三昧令彼衆生長離憎嫉復有菩薩興發悲心使彼衆生解無常義或有菩薩遊喜定意有瞻觀者令解空寂復有菩薩發金剛心皆使衆生成弘誓意復有菩薩廣大其志延致一切入已刹土復有菩薩以身法本令彼衆生初中竟善復有菩薩入不閑處興顯三寶使不斷絕或有菩薩以權方便隨前衆生應變適化復有菩薩閑居靜處觀有爲法如幻如化或有菩薩樂在空慧觀此形體如彼牆壁或有菩薩心意質直所行清淨亦無穢汗復有菩薩情性至密所遊之方而無漏失復有善

薩心趣一道不使衆生聞三乘之名復有菩薩志樂鮮明洗浴前人永無塵穢爾時世尊在大衆中讚歎彼菩薩曰善哉善哉海藏菩薩乃能吾前於大衆中而師子吼歎譽菩薩所入定意使來會者悉得聞知斯諸正士所遊定意三昧正受不可思議無能逮者非是二乘所能思量菩薩積德不自爲己念拔衆生受苦惱者正使三千大千刹土其中風起彌滿世界周旋速疾如隨嵐風設有入檢道跡之人心欲專逝於中往來尋能成辦而無罣礙况復菩薩神通大士三昧正受而可思議轉念之間以過恒沙無量刹土復以六度十善之法教化衆生訓以善道其心永安不可動轉志行寂靜亦無錯亂若興心行亦無能及斯由前世衆德具足志行庠序不別種類大慈無盡亦無窮極一切諸法常自存在衆生不達謂有興衰法法自生法法自滅法不生法法不滅法法生法滅性不

能六

八

移轉斯是菩薩大士之道非諸凡俗之所及也衆生之類在於生死不達道本謂爲法性而有變易設當介者此事不然菩薩從初發意以來行施行戒衆德具足所獲果報得成道者由解空觀虛無寂靜宣揚去來神妙行業皆悉成辦入諸菩薩所修行地遊於殊勝無量佛國勸發衆生度生死岸曉了根門隨時適化靡所不濟或以世俗威儀禮節或以神足神通道慧育養生類分別六情塵勞興衰眼耳鼻口身意所起眼亦無常亦無真實去亦無處來亦無跡耳鼻口身意亦復如是過去當來現在之法亦不見生亦不見滅羣生愚惑計有常想何以故最勝當知菩薩大士權智普備行於無量諸度無極立成信地廣修諸法爲諸如來所見稱歎除去妄想得無量智辯才無礙常懷慙愧觀法無起不見動搖或以相好莊嚴佛土所行與法不相違錯入於甚深一切道智咨嗟聽法亦無厭足

權智隻步降伏衆魔或至有想無想之處或至梵天帝釋宮舍或至十方恒沙國土所遊之方興有佛法所設玄遠不可思議除去憍慢亦無是非

爾時世尊復告最勝菩薩達士修於無量正覺法門四意止四意斷四神足五根五力七

能六

九

覺意八直行摠持強記而無缺漏以法意止有爲無爲有記無記有漏無漏十力具足諸法無畏三昧正受斷除陰蓋曉了分別不退轉地復以三昧正受之力超越慧業五十七法菩薩當念使不忘失若人布施求諸天福或求鬼神諸龍宮中或以施心生四王天復

有欲得生二十八鬼神將軍斯皆不具不獲其願爾時世尊便與最勝而說斯偈

身淨不行惡	口行無四失	意法不念罪
是菩薩摠持	頌宣無量德	永無慳貪心
神通除闇冥	是菩薩摠持	教人布施時
無令有願求	失願墮三途	功勞唐有捐

吾昔求正覺 想著經劫限 方便涉生死
五道爲遊觀 復於阿僧祇 造修立德本
由不得自在 遊戲四淵池 今雖得成佛
獨王三千界 斯緣去想念 得入玄路門
道場放金光 億神來歸命 隨沙門善神
皆來而自歸

是故最勝當念專意除去想求解了法界一
想無形修治佛土明慧不斷不勸助業普施
一切無施無聖了無所生平等一乘不見若
于最勝復當分別四諦苦由何生復由何滅
此五陰身苦之根本以審諦觀當求滅之集
由苦生盡滅無餘邪疑倒見有六十二以無
量智解無處所復以四諦觀十二緣起從何
生復從何滅漸漸思惟乃知淨寂身日意行
亦復無主亦無授者亦無來去亦無住處從
須陀洹上至正覺亦復如是分別欲界色無
色界
復次最勝菩薩思惟知苦出要苦集出要苦

盡出要苦道出要如實思惟復當分別十六
聖法甚深難測三十六物惡露不淨宣揚無
上道果之慧頒示訓誨導之以漸諸佛深藏
靡不貫達所出言教終不虛發或現大財殊
持長者因其所施攝取衆生周旋往返令成
其道或以香華光明幡蓋廣顯照曜皆使周
能六

遍復以神足感動諸天宣及佛道使趣一乘
故我累劫不以爲劬復現聲聞緣覺之道託
居山澤不現滅度復入龍宮化諸龍子得在
道檢如是最勝菩薩功業不可稱限非口所
宣非意思惟或時菩薩生轉輪王家天上世
界悉蒙將導復受十善若見衆生在饑饉中
輒以甘露令充其乏荷負衆惱離愛欲中菩
薩比像不可稱量
復次最勝菩薩當念千七百定意法門令諸
無著得成正覺復有光明定意法門令菩薩
速摠持顯要復有道樹陰蓋定意法門三千
世界蒙獲覆蓋復有兩世神珠定意法門放

百千億無數光明一一光明出若干種苦空
 非身無我音響聞音聲者皆發無上無退之
 心復有水精無像定意法門令十方世洞然
 一色加出若干音樂之聲其聞音者自識宿
 命知所從來處所窠窟復有月盛滿足光明
 法門在衆獨曜如月在星復有日精光明法

門現衆生眼令知進趣復有感神光明法門
 授大乘決無能知者復有無見頂相光明定
 意法門在衆獨尊與恭敬故復有舌相光明
 定意法門處衆信用無誹謗故如是最勝菩
 薩所入比像千七百定意光明法門無量清
 淨即於座上無數之衆聞斯法者發於無上

能六

十一

正真道意自昔以來未曾聞見是時東方去
 此無數恒沙世界有一菩薩名曰寶勇將諸
 眷屬前後圍遶至此忍土前至佛所頭面禮
 足在一面立叉手向佛而歎頌曰
 和顏色殊特 人中尊第一 塵勞無垢穢
 施以無量德 其明照百億 鮮潔知無涯

慈悲一切人 獨步王三千 我等今日來
 欲聞甘露慧 願演時得濟 如渴奔流泉
 導師時乃至 如彼優曇鉢 我等病根人
 為救為作護 今所從來處 去此無數土
 飢虛甚積久 願為宣示之
 是時寶勇菩薩以此偈讚佛已復禮佛足各

次第坐

爾時世尊告來會者諦聽諦聽善思念之吾
 當分別說於菩薩無生滅行上中下善哉在
 心懷時諸菩薩白世尊曰願樂欲聞世尊告
 曰道者非生生亦非道無想是道想亦非道
 無者是道有者非道無著是道著者非道有
 欲成道斯亦非道無成無欲乃謂為道意繫
 根門亦非真道除根門者乃謂為道時會喜
 薩復生此念云何名為無生滅行復言是道
 今言泥洹豈非道乎爾時世尊復知大會心
 之所念告衆菩薩曰云何泥洹異於道乎對
 曰非也若使泥洹不異於道何以故言斯是

泥洹斯是道耶此是無爲此是滅盡此是快樂安隱之處或復稱言此是名色六入此興則興此滅則滅復是泥洹道耶對曰非也世尊佛告曰善哉善哉如汝所言道非泥洹泥洹非道生是滅本然滅非生道是泥洹之本然泥洹亦非道也名色六入亦復如是爾時衆會聞斯說法無生滅行定意觀時皆逮得無生滅心不復退轉

十住斷結經卷第六

能六

溝澗上古反溢夷一盟音明爨丘逆反戢阻也

十住斷結經卷第七

能七

姚秦涼州沙門竺佛念譯

神足品第十二

是時最勝菩薩前白佛言世尊云何菩薩於施戒忍辱精進禪定智慧有進有退復有菩薩從初發意至成作佛未曾處在父母胞胎

常得化生復以神足遊諸佛國亦無國土之想唯願世尊一一分別使將來世諸學菩薩道者知其所趣

爾時世尊告最勝曰諦聽諦聽善思念之吾當爲汝一一分別最勝白佛言願樂欲聞佛告最勝若有菩薩行施戒忍心念有想精進禪智一切諸法與想著意或有世界無世界想見有衆生無衆生想見有去來無去來心見有現在無現在意見有著斷無著斷心斯是初地根力成就便當與十法相應云何爲十所謂如來神德不可限量如亦一相無所望礙正覺名号不見染著一切諸法不見越度等現三乘不見所趣不著世界解知名号無去來今所謂名相謂一切智亦名法界懷來道故將護彼志不傷其心如是最勝斯諸法者亦無處所來亦不知所從來處去亦不知爲從何滅菩薩行戒忍辱精進亦復如是戒亦無戒忍亦無忍解知精進不見有進若